

Segun Director Interino Sr. Marlon Croes

Mantencion di Linear Park ta cay bou di DOW

ORANJESTAD - E proyecto di Linear Park ta parti den tres, cual e prome tabata Plaza Turismo cu a tarda pa por a keda cla. Recientemente a cuminsa cu e di dos fase di e proyecto, cual e compania di Arubaanse Wegenbouw Maatschappij ta trahando riba dje. E trabounan di e fase ta bayendo hopi lihe cual mester keda cla na December.

Despues cu e proyectonan aki keda cla, mester mantene henter e proyecto diariamente.

MANTENCION DI LINEAR PARK

Ya caba por a ripara na e Plaza Turismo tin algun scheur, y e pregunta ta kende ta encarga pa mantene mantencion di e proyecto completo di Linear Park. Segun e Director



Interino di Dienst Openbare Werken (DOW) Sr. Marlon Croes na BON DIA ARUBA, normalmente Linear Park 1 cu ta practicamente entrega e mantencion ta cay bou di DOW cu Gobierno. DOW lo tin un team cu lo haci e trabounan chikito di mantencion di e Linear Park, den e caso aki si un klinker of banchi kibra nan mes mester drecha esaki. Tambe team aki lo zorg pa e mantencion diario di e Plaza.

Segun Sr. Croes na BON DIA ARUBA, e di dos fase di Linear Park ta un proyecto cu a wordo prepara den nomber di Gobierno. DOW a tene cuenta cu hopi aspecto den e proyecto aki, cual ta un continuacion di e prome fase. E plan ta pa keda cla cu e di dos fase di Linear Park na

December, pero e trabounan ta avansando lihe. E proyecto aki ta bayendo bon na ora y si tur cos bay bon e proyecto aki lo wordo termina na final di November comienzo di December, segun e Director Interino.

TRABOUNAN PREPARATORIO PA FUTURO

E proyecto aki ta cuminsa desde e rotonde Las Americas y ta termina te cu brandweer. E proyecto aki ta consisti di pone un luga di core pa bicicleta y un pa hende cana y parkeerplaats pa autonan cu ta yega pa mira ora avion ta baha of subi, segun Sr. Croes. Tambe a pone trabounan preparatorio pa un futuro cercano por pone un iluminacion riba e plasa aki, y tambe indicacion pa e matanan cu lo mester wordo poni.

TIN OBSTACULO PA ESUNNAN CU KIER SUBI NAN AUTO

Como cu e idea ta pa hende por sinta banda di aeropuerto y mira con avion ta baha of subi lo tin parkeerplaats, tin hende lo kier pasa nan auto riba e caminda di bicicleta of esun di cana pa asina nan por para nan auto mas cerca. Sr. Croes ta sigui bisa BON DIA ARUBA, nan a crea un facilidad cu un hende por dreña via caminda grandi, y tur por para nan auto. E parkeerplaats lo wordo haci cerca caminda cu personanan por cana bay na e miradonan cu lo bay tin. Pa esunnan cu lo kier purba pasa riba e caminda di bicicleta y esun pa peaton, esaki lo tin un altura di 40 centimeter cu lo ta un obstaculo pa esunnan cu kier pasa riba dje. □

